



琅嬛詩集卷之二

太初篇

大道被墳典古風匹唐虞皇皇

盛今代皞皞生民如擊壤順帝則讀書遂吾廬曷云小
雅材聊復中隱儒解脫古強詐拔讎襍卷麤中庸以治
世參同以治吾始於毋自欺久乃常自娛不餌金丹藥
悠然見太初

桃源行

世人傳桃源往往過厥真我讀元亮記止言先避秦竭



來武陵口似是其子孫久隸晉家土已非秦代民若云
修仙者牲殺安得陳流目觀大化隨地無世喧自我習
疎嬾陶然庶全神非非寧衆訕是是吾獨存朝覺杞狗
吠夕見靈龜蹲或鳴臂上雞且駕尻間輪此乃長生訣
一笑桃花源

春日有懷疊韻十八首

亭圍花藥錦屏風門隱溪流畫舫通三尺波光新雨後
十分春色小牕中低垂楊柳絲痕綠爛滴櫻桃豆蔻紅
點檢苔磯青蕩笠此身端合就漁翁

經過二十四番風舊雨天涯夢未通鏡裏荷花酣秘監
尊前桑落感郎中睽違髻髮防衰白醅酌容顏發醉紅
何日松陵催短棹肯來重訪躡嚅翁
不借班超破浪風那將別賦惱文通吟裁錦繡歸囊底
笑領雲山入畫中蠟屐破苔棋院綠羅衣搖燭酒樓紅
片颿直指錢塘去應向蘇堤謁醉翁
枝頭翠鳥絮春風再入羅浮好夢通流水已非前渡日
桃花猶是此門中鏡奩巧琢旃檀紫盃合新雕琥珀紅
聞說歸舟期夏五可堪消息報衰翁

草書渾未學楊風聊爲兒曹寫一通豈有烟雲生腕下
毫無傀儡在胸中垂簾石蘚沿鉤碧落斫瓶花襯紙紅
亭外牡丹應謔我新詩時犯謫仙翁

年年搔首問東風來去人間有路通別恨相看詩卷裏
餘生已落酒杯中筠抽竹閣含新粉蜜溜花房釀瘦紅
斷送韶光天不管簫聲愁絕賣餛飩翁

繚亂楊花撲面風花間覓路鳥先通琴傳雨意來絃外
石引泉聲出竇中異蜨忽翻雙翅黑游魚初閃一鱗紅
亭臺麗景看無限算是雲門四皓翁

投官豈有二疏風名姓年來少客通氣味_上歸清苦裏
心情都付黑甜中惟嫌明鏡欺斑白不省香車踏軟紅
他日若尋閒伴侶主人端是鹿皮翁

杏壇鼓瑟舞雩風歌詠遙情物我通誰謂狂蹤遺世外
直教春興滿寰中箋行字護紗籠碧劍影輝騰蠟炬紅
遲暮韶光還好在天容矍鑠此衰翁

一室絃歌操國風諸生園問叔孫通古人禮樂歸無外
大塊文章在此中雲濕月光分黑白水臨花影見青紅
真源活潑誰能繪指點鏗然曳杖翁

凭闌高閣坐春風插架奇書白虎通藐古弗論千以上
同人多在二之中天隨芳草無邊綠海近扶桑有底紅
登眺偶然生逸感欲攀葛嶺得僊翁

少年意氣直追風垂老行藏百不通一劍蛟皮羶匣裏
半彎蛇影踞杯中頭顱恕我霜前縞面頰驚人酒畔紅
邇覺詩無紕纒處口吟未免蜜翁翁

曾聞五柳有高風好把桃源付阿通靜抱嶺雲來席上
酣眠春色入壺中問誰送酒衣飄白若個尋雲棹轉紅
我借武陵移鏡水不教靖節占稱翁

世事空驚電與風莫將流水訴窮通媿無鑿脚留淮上
幸有槎頭泛越中玉版參師安太素義糧給族乏陳紅
浮生鑑曲應多戀敢擬西村陸放翁

花信今朝第幾風玳梁歸燕拂簾通藥攤弱女熏篝上
詩雜良朋札裏中近隴茶烟光澹白遠村梅雨子酸紅
釣竿一擲滄江去好伴翛然碧繼翁

石磴彈琴答好風苔甃蟄蚓碎泥通瓦新濕藹蒸簷隙
枝嫩清光逼檻中亂麥鬚搖颺尾碧零花瓣糝蝶身紅
么磨細景吾能寫待寄城南蠟屐翁

舊披蠶扇領薰風新曬蟲編辟鞠通清峭碁聲行石背
紆徐香篆裊牕中花秧密佈零星翠字縫勻圈逐句紅
生恐畫眉嬌怨慣開晴啼煞白頭翁
挂壁長箋響午風欄干亞字曲廊通淋泫細漲陂塘上
峇嶠遙嵐罨畫中猩血薔薇翻姹紫鴛行芍藥鬪殷紅
叩門客到兒僮喜猜道前番賣藥翁

浩歌行

天何蒼蒼地何茫茫嗟人生之旦暮吾獨胡爲乎悲傷
謂皇天之無知兮俾我離別願拓地以自寬兮中心淒

惻南浮湘水屈原自沉東游峴山墮淚碑陰比翼飛而
見傷兮哀鴻過而相號忽昂昂若垂天之鵬兮松衮衮
以風濤幸我心之磊落兮羌酌酒以自遣雖九死其無
辭兮覺三生其可羨吁嗟乎白日馳光紅顏斷腸今日
北堂明日北邙胡不乘雲歸故鄉

歸去來歸去來丈夫得志風雲會風却吹雲頃刻開劉
項孫曹旋已矣漢魏齊梁安在哉今日東牆筭化作森
森竹明日月中桂散作霏霏粟今歲高門朱雨轂明歲
窮途赤兩足歸去來歸去來一杯一杯復一杯兩人對

玉京集 卷二 王郎歌莫哀

酌山花開白也詩無敵王郎歌莫哀
王郎向我笑此笑誰知道一笑浮雲富貴如男兒埋沒
隨百草北邙青草邱與墳白髮何故來紛紛搔首問天
天不語天卽有語我不聞我不聞天有語語我貴語我
富我不欲聞掩雙耳語我酒語我詩我卽不聞心得知
酒百斛詩五車笑他富貴空繁華願隨夫子天壇上閒
與仙人掃落花

有所言

大衍先天策後天祇憑方寸見偏全唐虞精一爲心法

孔孟中庸是性傳花放水流歸定相鳶飛魚躍沂真詮
由來變化儒生得和露時抄象象編

帝典王謨括道幾左言右動省危微半毫君過皆臣過
千載家肥及國肥隋宋之間真錄少春秋而後述才稀
浮夸佞屈雖苛論只在忠良辨是非

玉京篇

有客示我玉京圖此圖噩噩不可摹大羅森森周紫樞
三十二帝羣神趨七寶城臺金碧櫺東西日月如吐珠
三宮巍峩通一隅翠旗靈車光有無珊瑚枝綠葉而朱腴

蓮花十丈而扶蘇仙梅百窻鶴獨呼牙籤錦軸香不臞
得道大衆繙閱殊吾願馭氣餐醴歸玉京兮日未晡
子曰赤松公曰壺

寓意

德車結鴻網文辨鬪穀洛但復旌師饋勿撓稭層錯吾
生如寄耳天巧傷剗鑿恐坐蠓殼粘虔致鼠鬚卜一寸
雞窠兒不肯舌搖鐸使子春風中舞雪蓋匪惡

新河行

海門潮汐排兩衙庵庵黜鼓豐饜搗初游一條白蚌背

旋撒千股黃龍沙洄洑激盪森可懼篙師絕叫隨魚蝦
船頭半沒船尾聳一氣直打鼉鼉家怪石突兀充夜叉
浮山魚浦相犬牙關弓怒歎錢尙父服甲欲借吳夫老
記我葉張如敦夫滄河鑿嶮平谿笭江湖麤了忽飛鷺
世事此生多畫蛇但使橫坤罷民虐萬金擲水安足誇
黃濤春卑秋不厲惟有碧漲清而澤此日蘇堤千頃葑
六橋無際着梅花

幽人

幽人興未已返景歛將入牛下孤村煙鴉飛半峰雪

曉至耶溪

披霧出人家晨光噪萬鴉大江寒少日高樹曉成霞酒
店門初啓溪橋路自斜不辭頻拄杖沿路探梅花

自嘲兩首

野鶴閒雲不繫身強畱詩債落紅塵作羹未免如新婦
織素依然比故人迎岸花香候翫屐隔溪竹色染衣巾
未妨卯酒開吟鑰領取融融萬象春

暖檐索笑漫逡巡已覺陽和迨早春執筆自書新甲子
圍爐相守舊庚申閒鷗與世有何忤獨鶴于人無所親

擬卽歸山猶戀在小堂功課了前因

小堂

不減裴公綠野堂千秋事業付羲黃誅茅頗愛臺佟癖
盜酒終嫌畢卓狂適興雲煙飛落紙談心風雨坐聯牀
問君得似元和老便向林泉號漫郎

朝聽賣魚歌

不是神僊張志和斜風細雨一漁蓑停船坐看秋山曉
口唱白雲黃葉歌

曳杖

曳杖出柴門紅日初上樹却看草上霜猶是秋時露

幽居

終日卜幽居幽居今日初怡情惟竹石候興有琴書日
奪茶光淡風吹酒面疎卽將莊惠比祇我是閒魚

卜築計方成開門趣便生野橋隨水度村寺帶鐘行木
落鴉爲葉山空屐有聲蕭然謝軒冕端已懶逢迎

老去一首

老去興尤濃騰騰過一冬安能效雌伏不自嘆龍鍾山
遠有煙意日高無雪容孫登早相訪長嘯入蒼松

書石蘿

半壁絡蒼藤幽局似定僧水僊彈綠綺山鬼泣青鐙竹
葉杯深把松花飯細蒸却看明鏡裏壯髮久鬢鬢

平生

憑誰杯酒說平生不愛梅仙變姓名筋力盡衰方鬻駱
文章不死浪騎鯨雲來雲去無蹤跡花謝花開有性情
我擬懺除蘿蔔火更丸一藥寄公卿

曉至

萬葉聚晨光梅花數點香老人拖蠟屐童子負奚囊爨

瓦霜難白冰池日漸黃
邈然吟思起遽命進壺觴

前韻

疎簾捲燭光清茗瀹花香
注墨磨銅研繙詩出錦囊
煙梳山髻細日湧塢尖黃
卯飲無妨樂相陪盡此觴

幽僻

曉坐愛煙霞溪灣第一家
搖杯春入髓嚼句雪生牙
寺古唯鐘響橋低可釣楂
由來幽僻慣好在餞年華

飲綠荔支

野水荒荒白朝山緩緩青
霧收初有樹風斂已無萍
爪

畫來禽帖神通相鶴經
一杯還更把重碧荔支馨

偶成

隔隴釣船行空堂鳥雀聲
日高霜半去煙盡水全平
問字人初起尋題句已成
近來添一累常恐食鷗盟

小圃

圃列辛盤菜池容丙穴魚
鷗爲三品鳥竹是八分書
擲杖同元放鳴琴比相叶
如清談恆壘壘幻夢任蘧蘧

酒酣

酒酣擲起葛仙筇眺望東南
百朶峰穿日水光飛似馬

逆風帆勢轉猶龍乾坤蒼莽生奇思猿鶴逍遙覓舊蹤
爲報孫登仍早訪果應長嘯下高松

有感

橘裏談棋豈不平年來局外看輸贏漫誇城北徐公美
敢竊關西孔子名若使秋風馳匹馬何如夜月飲長鯨
紛紛採璧求珠者臨水登山別有情

生計

生計在林巒棲遲閱歲寒夢狼方啖腳食馬幸留肝日
暴花爭富風平竹自安任他飄錦帶跨上杏園鞍

古今落花詩多矣戲成

芳草萋迷賸綠茵餘香斷送古今春縱教懶隴能醫頰
難得蛾眉更效顰此恨只流知己輩無情不算有才人
東風一夜鵑啼苦惱亂楊花認後身

黃蜂紫蝶故翩翻零落空枝倍惘然春水綠波如昨日
美人香草是何年已知舊怨消羅綺爭奈香魂墮錦箋
風撼鈴聲應有意起看殘夢逐飛煙

空亭宛轉送斜暝消受春光已十分但有錦囊收爾骨
不辭香土壘成墳無端似淚飛紅雨祇擬將情付白雲

濃綠滿枝剛好在憑誰却掃與殷勤
欲共東君子細論強遭狼藉竟何言千秋薄命難回首
一雨關心又返魂盡日飄零隨逝水有人偃蹇嬾開門
芳堦且席苔紋坐莫負黃鸝勸舉樽

卽興

不向桐江挂釣蓑肯來驛路唱驪歌十千自換金陵酒
八九能吞雲夢波天外浮雲橫日夜渡頭落木照山河
銅厓鐵冶終銷蝕且刻梅檀作叵羅

秋柳

楊柳不知暮蕭蕭秋水寒狂綿三月盡衰鬢幾人看白
下情何極青春夢已殘長條任攀折不解隱離鞍

秋蝶

妙舞空千古狂香悞一生風流非昔日輕薄是天成栩栩
真如夢涓涓尙有情尋花在何處枉負冶遊名
又作春蝶以解前

自訝無閒刻飛飛過短堦由來疑傅粉不敢浪尋香春
色濃三月風情舞幾場游仙應有夢莫負探花郎

秋葉

飄泊竟如此翩然辭故林也知根本在其奈歲華侵霜
力能誇艷風聲特警心一巢危不墮容易見歸禽

秋鶴

往往警秋露昂頭時一鳴果然矜獨立亦復愛徐行糧
盡花爲料池空月有情何須九臯上天外已聞聲

秋燕

欲別戀雕梁多應返故鄉性靈能擇主社近更銜香舊
迹烏衣巷前身畫錦堂雙棲仍在此不必太淒涼

秋蟬

抱琴欲何向獨樹一吟秋飲露真高潔臨風強唱酬迹
應仙蛻去聲在別枝流翻愛斜陽好因君卷幔鉤

秋蜂

性與花俱懶情憐蜜已窮早完全翼課不趁細腰風僊
飯應難化衙聲本易空自從黃退後無復較雌雄

秋蓮

不染原君分淤泥解得無苦心偏自透輕步爲誰趨豈
不憐紅粉其如墜綠珠凭闌无限恨顛顛任江湖

秋草

爾本無知物非春亦發生雨多青得意煙冷綠何情
劇土金鈿出緣堤蠟屐行還應防野燒不要太縱橫

秋螢

不自羞微焰流輝點畫屏前身元草草俗眼忽星星
檐際無風上林間有火停光芒寄豪末咫尺就飄零

秋蚤

白月一天苦清霜滿地驚可憐衰草命空作斷腸聲
但覺燈無色翻嫌夢不情空庭高臥者爲爾絮平生

秋雁

楓葉蘆花浦瀟湘落照天孤飛一點遠清唳幾行聯
珍重傳書後翱翔得路先高樓不成寐秋夜自蒼然

又作秋蝶以自嘲

游仙徒已矣從此悔風流莊叟魂偏在滕王帖未收
曾經衆香國更醉百花洲座上春風早憑君栩栩遊

秋月篇

手弄秋風絃口吟秋月篇秋風吹白髮飛向月明邊
美人不得意吹笛畫簾前

漁浦詞

水落芙蓉秋漁歌不知處雙鬟弄槩兒却隔蘆花語一
笑指漁郎月明人自去

思歸引

簫聲不自匿縹緲出羅幃妾非綵鸞女莫逐白雲飛借
與風吹去郎君歸不歸

離鸞

日出萬松黃月出萬松碧上有孤棲鸞哀鳴已頭白頭
白鸞不辭化作貞松姿誰知松下客彈成寡女絲

相思行

去時桃花紅妾家門前歇君錦繡車今來妾比桃花瘦
想見君心如錦繡錦繡春深化作灰思君不見淚珠催
淚珠只在心頭滴滴到君心淚猶熱錦繡回文寄不靈
含情更與桃花說

古意

游魚戲池水不損水色清魚戲損水色水質清且貞脩
竹在空山秋風與之聲風沈竹自靜復此蕭然情臣以
忠被謗婦以節見輕一死不貳志千載有芳名

夜分與諸子劇談

星斗迢迢夜色闌小堂燈火耿盤桓已取酒光浮琥珀
備聞唵響戛琅玕落月梅花橫瘦影傲霜楓葉暗深丹
拂衣未肯飄然去醉脫尊前紫綺冠

征戍詞

征戍邊關人未歸重衣如鐵裏霜飛劉琨左手彎繁若
清嘯能令賊棄圍

慎交

晏嬰與人善柳惠惜已言吾自愛吾鼎贈言榮贈軒薰
猶本異器蘭蕙乃同根季子然諾重魯連布衣尊如何

捨離雀竊笑橫海鯤結交慎其始道義當日敦

曉飲

白日已上烟冥冥蘆花飛雪揚洞庭螺鬟映帶各左右
美人笑畫雙眉青飛瓊紅袖捧綠醪欲飲不飲愁未醒
少焉白日已在樹擊汰揚波竟歸去

忽困

忽被林巒困經營又一忙池新魚不活石峭竹多傷割
愛判刪笋通泉儼鑿塘待予安置妥徹力助傾觴

詩債

妙藥元無藥真鉛不是鉛酒牌當勒石詩券不銷錢安
石東山屐知章鑑水船登臨不辜興便卽榜游仙

清霽

宿霽開清曉浮嵐歷翠微花衰煙意減竹動日光飛聚
籜炊茶竈聞香覓酒旂一蓑苔樣綠取坐就漁磯

偶書

抱琴不用嘆知希回首西山聽采薇縱使生前效雌伏
猶令死後贈雄飛飄飄俊鷲空搏翼浩蕩閒鷗早息機
幸免此身嬰鼎鑊便甘料理薜蘿衣

倡和

張翰思葦鱸王喬解寫鳥神全緣醉者服盛笑僧乎問
法三三指消寒九九圖陽春吾有曲倡和亦清娛

高齋

漱鼎松風蟬眼煎高齋危枕對雲眠漫思弱水三千丈
且酌西湖六一泉出出梅花初近雪絲絲楊柳已無烟
枯腸未免多芒角又遣兒僮棹酒船

和放翁幽居歲暮詩五首

今古幽居者均爲歲暮人
隙駒難繫足屈蠖且潛身
風

落冰侵夜煙升水借春呼兒收芋栗滋味在清貧
久與貧無犯胸中萬斛寬編蒲溫絮鞵削筍炭皮冠鏡
照牕生浪爐烘硯有湍莫嗤容邾小情話儘團欒
焚盡丹霞佛參空玉版禪吟邊安樂地酒裏色香天樹
老傍懸瘦苔冰塊裂錢措筇聊憩勝信步入寒煙
村市人稀到隨綠度物華烏能知柏子蜂不見梅花乞
火來僧院頒鱗出釣家臘膠籩已熟一醉帽簷斜
鴉落夕陽低人行橋影西探春先有信覓句半無題草
舍藤維犢蔬田棘護雞衰年從醅酌不問路淒迷

遣興

心靜鶯聲遠身閒短景長篋搜黃石秘銼碾紫車香縱
少封侯骨猶餘刺史腸銅鞮如醉拍矯帽過襄陽

無題

狙能招射寧非巧公若移山未必愚收拾百家旋志蟹
蠶除一恨倍思鱸應消賀老纏頭錦去買燕公記事珠

四首

滄海橫行釣六鰲青山歸去臂飛猱揮絃意與秋鴻遠
攬鏡形同野鶴高對客舒毫伸繭紙畱僧翦燭品松濤

老夫自有金丹在不向人間諱二毛

每騎白鶴下揚州來醉稽城落月秋談辯縱橫麾玉塵
詞源霧霽瀉金甌祇憑方寸靈臺地直濬三千弱水流
便借長風歸赤縣不教暮雨合羅浮

錯落胸中五嶽平修蛇半沒歲崢嶸囊間白虎蹲經歎
匣底青龍繞劍鳴星斗燭天生寶氣文章擲地走金聲
牙籤鄴架空三萬潦倒風塵浪得名

檻外條條綠水多標天遠岫鬱嗟峨鷓鴣落日窺燈哭
鷓鴣衝風帶箭過塵世茫茫消浩劫襟期磊磊闢愁魔

狂吟未免多催促畱護紗籠掌碧蘿

薄暮

清曉忽昏黃行行步竹房啁啾喧雀廩襖靄遞漁榔煙
漸收山影霜猶避日光挑燈重把筆寫作雁斜行

夜坐

遠漏和金鑰溫磨度綺寮中郎嫺弄笛道士解吹簫紅
袖簪花奉青鐙起草挑枝頭聞翡翠梅意已春饒

是夜長至

紅燭當銀蟾梅花笑畫檐飛灰初按管落日早垂簾灩

盪金杯煖沉沉玉漏嚴諸君如刺繡一線性靈添

鳥窠石

鵲巢人不見見此岫岩堯活石經年大羣鴉向日朝枝
柯猶落落蹤跡久寥寥紺宇真仙在懸厓挂一瓢

曉望

青山如故人上樓忽相見浮雲一以散秀色凌蒼漢鴉
驚僧磬飛石帶茶煙斷修竹兩三家風引梅花片

掃地

曉起卷氈簾轆轤鳴古井呼僮挈花帚灑掃沿石磴弗

惜破綠苔慎勿傷花影

新冬

昨日逢長至流光赴瘦年葭灰行已動膏火坐相煎白
髮難爲鏡青囊不近錢待看新雪後楊柳已生煙

階下鶴

翩翻羽客傍山林飛入青天不可尋花藥滿園全不顧
總教平立有高心

遲陳新序

載酒人何處開門水自流便乘青雀舫遠贈黑貂裘吐

氣空驚座飛身獨上樓還應一杯共投轄話綢繆

和蘭賓不寐原韻

不管短長更長吟度短檠霜明花影重月細竹烟清香
篆高成塔泉聲互奏笙遙知故鄉夢愧我雁無情

前因

適興在紅塵棲遲又一春夢中原有夢身外豈無身綠
水圍衣帶青山聳角巾前因猶未了又結後來因

孫筠谷至

五雲佳氣鬱樓臺萬草千花手自栽冬笋漸抽三尺起

臘梅初翦一枝開心能不愧何論福句要無奇莫見才
歸去天台方有約人傳作賦興公來

咏水僊花一律

不是天僊是水僊綠衣黃裏轉翩翩凌波微步春無跡
傅粉新粧月有妍雅調合依姜白石前身宜配李青蓮
靈根淘洗丰姿澹畱供名香短几前

閒步

醅酌淺三分攜筇更訪君遠烟平在樹細水淡無雲短
笛臨漁唱遙帆送雁羣不堪吟眺意歸路半斜曛

鷺雲庵

遙望入層雲松長路忽分斷碑三代物荒草六朝墳石
勢訛龍子風威黨虎君一庵松檜裏香靄自氤氳

歲月

歲月脩蛇沒搗鱗尾已行松輪僧臘長雲傍客心輕土
煖黃鶯蟄蘆殘白雁驚浩無衰朽意轉有小兒情

絕句

莊周不必齊物鄧禹何須笑人我自周旋作我不知誰
主誰賓

懶

未容活計笑荒唐端向真仙討懶方偶過竹林陪阮籍
閒遊藥市遇韓康貧中樂在原非病醉裏神全恰可狂
但有公權荔支綠千杯還酷爲君嘗

就多酌我次公狂且復中之已坐忘未用關門防客走
正須登屋看人忙健行自認東西路高臥無分上下牀
宿墨試磨鴝鵒研還應蛇蚓絡驚行

薄午

薄午一行吟蒼然松竹林鐘聲僧寺古燈火佛堂深花

氣薰歸墨簾紋織上琴水仙吾有操彈動伯牙心

筆

一掃風雲起縱橫勢莫尋光芒長十丈聲價薄千金掌
底忠姦血胸中曲直心憑君指揮快今古判升沉

碁

曠覽千秋局英雄一戰場眼前關福命指上驗文章黑
白和盤見星辰納袖藏胸無不平事何用太豪強

硯

儘着人磨折依然太璞完誰能將我損畢竟此公端不

識金銀氣真成鐵石肝山中良宰相何止一身安

劍

望氣人皆寶談心我獨雄一條飛鐵雪三尺斷金虹破
匣猶聞吼驚途不畏窮自從知己死埋沒在塵中

尺

舉動亦尋常風流未易量但存三代直不枉一身長分
寸功須就毫釐辨必詳憑君裁度巧雲漢便爲章

鏡

看過人多少人愚爾亦愚千般真面目一笑好頭顱皎

若懸冰鑑明于設火珠如何不自照未免太模糊

字

一點不經意千秋有錯時常隨天地在不受鬼神欺俗
目真何有傳心宛在茲尼山遺憾事大抵坐刪詩

酒

直是無言友真成不漏仙四時失冬夏斗室有山川益
益生元氣融融住喜天消除多少恨一見一醒然

詩

忽覺心何去長教夢不安由來千古事將與萬人看苦

琢花魂瘦狂呼月色寒流傳爭一字莫要逞毫端

琴

勿惜知音少無絃亦有絃高山流水上修竹古松前夜
靜雲生壁亭虛月上天相思彈不盡太古自悠然

燈

風雨自蕭瑟烟雲終渺茫也知寒焰短無奈熱心長高
枕不成夢異書時借光花開忽花謝失喜爲誰忙

鐘

警衆何爲者空門太作聲風和疎磬遠雲共細泉平自

結人天響難容勢利情鏗然流古質不勒貴人名

扇

爾縱炎涼我飄然有可親何勞班女怨卻免庾公塵明月入懷抱清風來故人棄捐良足惜披拂感前因

錢

妙手本空空人情在此中小兒猶不舍我輩固應窮未足送劉寵焉能鑄鄧通一囊羞澀慣只合號才雄

紙

虛案忽生白抄書過一生莫嫌輕薄相自有笑談聲價

值三千絹毫揮百萬兵不應長覆瓿持贈亦人情

畫

花鳥飛鳴手煙雲供養身難窺無迹處先認有名人似水流方活如詩淡乃真仰頭空際看一樣妙傳神

十一月杪日作

去年今日雪花飛梅香滿地鶴忍饑今年無寒雪不見暖暖春烟融翠微莫怪陽和真有腳煖風便是丸寒藥天孫一笑隱雲端細剪銀河開水謔雪詔頻頒不可聞城頭鴉噪已紛紛年豐幸貯香秔飯臘酒新篘暖似雲

偶書

平生豪俠千人讐擊劍橫空斬鬪體一揮何止數百萬
舉手層霞凌九秋文章不貴伯樂死坐合意氣喪驂騑
陵嶒四海無青眼落拓千年竟白頭

種樹

小兒種樹望樹花花開不實老人嗟手指南山松柏樹
青青鬱鬱長抽芽春花開時蝴蝶舞春花落盡啼鶯苦
南山松柏長青青上有鸞鶴相對鳴下有仙人吹玉笙
白雲一片秋月明仙人贈我松柏子命君種向紅塵裏

蒼髯翠粒已爛斑坐使春花有媿顏塵尾閒磨鸞鶴語
分明坐我碧山間

蟲歎

觀書如熠燿燭火含末光未餐一枚字脈望矜仙方有
似世間蚓寒泥結吟腸春風噓蝦蟆歌謳兩相將縱懷
蛻蟬潔已受蝗螂傷一朝秋菊實破琴苔寒螿莫隨雙
蛺蝶飛舞百花香辛苦不知倦常輸蜜蠶糧三眠復三
起宛轉蠶上筐吐繭如白雪青蠅何足防

志諷

貧士寒無廬每興破屋歎家乏犢鼻禪短衣僅蔽胷自
云不慕勢瑟縮常達旦一朝近榮華奴僕享盛饌敗銅
高于山揮脫如急霰巷有乞丐兒如汝昔日賤日餐且
勿飽會當贈匹絹

園居無事以數點梅花天地心爲韻

吾園雖草草按日種佳樹百卉且芳菲幾不辨行路風
和衆鳩鳴月在一鶴度百年會有窮樂事當無數
一徑松風喧柴門行未掩客來具疎樽僮至設長簞遠
鐘過泠泠流水奏冉冉垂簾度清香孤螢飛一點

有時衆雨歇微雲稍徘徊起坐弄明月遙見涼煙開援
琴賦長調注鼎生寒灰相思灞橋上去探一枝梅
灞水不可去村流碧無涯行行入修竹晴雪兩三家取
火溫宿釀炊薪瀹清茶醉言何所贈一笑指梅花
白鶴隨我步我歸鶴行前溪橋接人影隨鶴上漁船手
撚梅花笑逢人怪酒僊融融問吟頰已是春風天
童子出柴門老翁歸已至松聲無襍言竹色有新意
簞脫腹藁拄杖記難字夕陽淡茅檐月影已滿地
久叨清平代復構幽隱林終日把耒躬耕白雲深風

微瓶花落夜永燈火沉誰能將好韻一寄閒居心

又一首

竹下無人深閉關松間有路便登山直從飛鳥閒雲外
更過溪橋流水灣借問漁翁不相識長歌歸去有無間

一年餘一月

一年餘一月一月不可過去若輪遞風來如爐沃雪形
骸固有役冰飭泣殘濕通計百年內勁弩發柔鏑行樂
須及時莫待羣芳歇冉冉韶齒歸蒼蒼暮景逼焉能貪
富厚鼓腹猥食鐵老猿亦相誚伸臂摘橡栗臘甕幸已

醇蟹螯猶可擘一笑盡百鍾再舉空一石醉中呼拄杖
遙向半天擲擬去踏青城不然登赤壁

縱酒作書

高堂擊劍龍吼天銅壺置酒鯨飲川放開九千萬里之
胸次吐出三十六朶之雲煙大風碎旬忽東鼓白日跳
蕩從西旋氣酣或與虎豹鬪筆落動作蛟蛇纏秦兵驅
狼隘函谷燕騎伐馬窺窮邊淋漓一筆倏勁折酒力迸
透鍾張肩我昔嶽崎藐權貴縱鷹獵兔窟遊畋歸來袖
却射鵬手猶能使酒如使船長江大河一葉舞迷離風

甬羅浮巔壺公長生赤松死盡此乾坤不涸泉

獨樂兩首

閒何闊逢諸葛烏臺赤日飛霜雪事不諧問文開權門
黃土生蒿萊老夫不管人誰某獨酌謠成將進酒濁酒
三杯一曲琴便關褒貶千秋口

曲有誤周郎顧請君聽我閒居賦莫說詩匡鼎來

叶請離

君聽我歸來辭桃源不襍雞與犬獨坐橫琴秋意遠美
酒徐徐酌一卮鏡中大小吾當阮

綠綺詞

美人贈我以綠綺之鳴琴何以報之千黃金黃金可冷
不可煖蘭膏淚滴鴛鴦衾珠簾沉沉生芳草繡幃不下
勞金鍼含情添綫綉知己費盡高山流水心

冬白紵

珍珠帳煖飄繡簾蘭膏燈薄掩玉蟾美人欲睡麝薰度
笑拔金釵籠指尖梅花似雪香心透玉容更較梅花瘦
臙脂合底手親調曉看凍顆成紅豆

散步

蹭蹬同衰柳扶搖仰瘦藤過村嘗臘酒逢店覓風菱紅

葉疑無路青山忽見僧老夫諳世事漸漸學龔丞

和蘭賓戲集劍南句元韻

吹笛下揚州耶溪載酒游十年曾放浪千里此勾留草
潤雲生屐花明雪放舟江南春色近何計聽歸休

自西湖歸

飛槩上湖亭烟波照鬢青吳歌今已冷漁唱不堪聽十
里衰楊柳千家白畫屏段橋殘雪外梅蕊點疎星

結茅

舉首碧山切賒雲蓋一茅僮知分藥種僧許借鐘敲渴

鹿窺泉竇驕猿探藪巢生涯只如此踈懶未須嘲

美酒置千斛新詩攤半牀經霜木奴飽穀火芋魁香老
衲逢碁敵時醫請藥方何須絲竹鬧靜裏足相羊

示耽雲

秋菊春蘭笑有餘燕鴻相代更何如流光疾似風驚籜
活計甜于雪壓蔬饒有心情憐竹石劇將身手侮蟲魚
若逢處士張承吉爲卜冬瓜堰口廬

天容小病懺高名電火光中過此生面目莫嗟楊伯醜
風流不減謝宣城窻虛香裊雲無迹池靜泉通月有聲

雅意要傳詩卷在熒熒墻角管燈檠

晚眺

萬壑炊煙外層城落照中
噪繁鴉警雪行斷雁隨風牧
笛投荒店漁歌下遠空
浪游曾秉燭寒景與誰同

不覺又夜

不覺又侵夜寒光飛滿懷
鈴喧僧上座柝急吏巡街
硯試新膠墨爐抽細網
柴陶然適情性偃臥閉茅齋

自示

物外任棲遲飄然海鶴姿
拈香成妙藥降筆寫新詞
酒

浩量胸斗巾寬套髻絲俗緣
吾怕管不是不曾知

咏香一律

裊裊煙痕度綺寮拈經妙手
六時燒寸心檢點工夫細
凡念分明劫火消供奉自看
三昧在紛紜都付一絲飄
餘灰不許風吹起更續丹爐
伴寂寥

寄金陵許瑤谷苾

秦淮十載契心源別恨深知
懶舉樽好便驚人丁卯集
何當窺我癸辛園淒涼白髮
猶遭蹇垢弊青氍可辨溫
安得松陵新雪夜等閒飛棹
下雲門

書醉香樓

曾經老子坐南樓不負吹簫化鶴秋取王亦壁何妨重

聖寺夢刀久已罷監州袖中綵筆凌張協架上牙籤壓

鄴侯為報尊前二三子乾坤端要此名流

臨風意氣直干霄眊眊都憑一斗澆口不言錢嘉蔡擗

手無釋卷笑崔儵虛心自澈懸臺鏡洗耳常聞挂樹瓢

儘屈諸君多酌我不妨狂過蓋寬饒

寒夜

細按書千帙徐聞漏一籤虛廊風張丈幃高閣霧生簾

閉目參丹訣科頭味黑甜繞壇叢杞老警比吠龍嚴

泛舟鏡湖用人在鏡中舟行畫圖為韻

我遊鑑湖曲不見賀季真感此風流地想見賢達人予

亦思乞休結廬遂高身君看香爐社千載此遺因

淺深蓬萊水變幻滄桑海倏忽已千載君看幾人在古

之謫仙人隱然畱文采相逢換斗酒殊復消魂礪

伊昔年七十耳目惛視聽優游池塘間恆以水為鏡至

今無丹藥心靜却頑病泛舟憩中流物外聞疎磬

木落山見根雲行水涵空波光八百里一一在掌中靈

秀出人物蒼茫思無窮有懷劍南子感與知章同
巋然劍南墓一臥天地秋精魄落明鏡隨風迎我舟隴
頭放黃鵝沙尾眠白鷗漁翁已坐睡手握釣綸鉤
日出孤烟平蒼蒼會稽城隔邨隱犬吠遠渡見人行菱
荷旣蕭汨秔稻復收成熙皞唐虞象合吾遺世情
浮生托天地片葉樹頭挂富貴幻層層有如畫中畫清
風與朗月不用一錢賣此波受此舟亦是天公債
昨日復今日有人游此湖湖光不改色人已入畫圖賀
老旣不見陸生今亦無烟波勸回棹愁絕白髭鬚

小窻梅花

今歲花已邁來歲花尙蒙之子自難貞臨寒迴化工形
枯類有道骨勁頗不豐以質比冰雪冰雪質太空將心
比鐵石鐵石心欠通有似安貧者皎立風塵中旁人動
歎賞恨不見春風或者神嘿嘿甘與羣芳同豈知桃李
輩路傍悅孩童惟有小窻上此花娛老翁

日短詞

老時恨日速童時恨日遲乍過清明節卽望端陽時白
日如流駒恨不速之馳何以速白日其意有所思放學

揖師歸出門逐兒嬉觀樞摘火艷剪艾懸青旗更望八月桂黃金粟離離又聖九月菊含霜綻幽姿嬉遊過二節畢歲以爲期既不慮索逋并不礙父師腳踏蹴鞠場手雕堅冰池雕冰出圓鑑挂日生庭漸俄飫辛菜盤旋竊椒葉卮冉冉正月盡乃以書爲維去日倏已過來日仍如茲來日復去日不覺羣及之兩眸拭又凍雙齒豁欲辭臨書手先顛把鏡髻成絲偶坐入睡趣閒行顛扶持方知童時樂卽是老時悲卽知老時悲未必童時知所以古聖賢說禮更敦詩禮重舞象勺詩刺芄蘭支願

于芄蘭下綴我一篇詞

續長慶後集閒居自題詩

屋簷香爐煙墻寫耶溪波小池假山下寒日漾青羅門無車馬行室有管絃歌修竹節不改鳴禽聲已和橋頭有漁者舉手指煙蘿此是白家翁借地便吟哦

竹梅

庭竹無多要低昂八九竿圍梅行已動疎密雨三攢爲愛先春漏消息更教每日報平安梅邊竹裏琴詩酒有一衰翁仰面看

賣者以九老圖見質爲書一章

九箇厖眉皓髮翁洛陽吟社仰高風誰知造化形骸外
盡在諸君掌握中錯意前身餓羅漢忽驚半面識輪工
傳神何處能三昧鏡裏猶然判異同

襍感

飛電幻泡休當真殘絲斷繭莫纏身二桃枉殺三勇士
五柳不知何許人甲子公然忘晉魏婚姻早已畢朱陳
看花穩臥閒驄馬爛醉郊原十里春

戲詠水煙壺

無端呼吸費丹田也托吹噓齒頰邊領取千鍾消礪魄
指揮一氣吐雲煙頓教曲水繁聲沸直怪壺公別法傳
那似荷筒盛白酒彎成象鼻酌清泉

和新序寒夜元韻

燈火不驚鴉全無笑語譁漏聲紆點滴春意育萌芽夢
破吟難續香殘數未差隔窗梅有色斜月洗鉛華

元倡中有隙窻燈引綫句余亟賞之惜其不成對
也爲作此

撥火圍深坐添茶破淺醺新不飲隙窻燈引綫冰硯墨生

紋月苦花陰切街長柝響分此時惆悵意豈爲雁離羣
其二

香篆塔層層蒲團法定僧隙窻燈引線凍瓦月分稜韻
顯無難字眠稀或壽徵捫心聊自遣賸比玉壺冰

前村

望若前村近經過路轉長嵐光疑薄霧黃葉永斜陽孤
雁無心度寒梅作意香剛思歸晚飯又見酒旗颺

自遣

蟬腹龜腸聽渴饑鼠肝蟲臂到期願博聞正賴南之沛

直宿真膺北有箕誰愛登龍飛尺木漫嗟粥駱遣楊枝
作詩報與谿頭竹踏石來叅玉版師

年來蔬筍氣全無飽看青山舊畫圖惡夢不愁星壓腳
孱顏那管雪尋鬢自裝漁艇拍銅斗更啓冰房吟玉壺
拋盡舞衫歌扇力謹呼藤杖接殘軀

和雲村曉起八韻

月色迥飛霜冰威欲裂塘梅開千嶂白竹瘦一林黃啓
戶人初見登場稻已藏晨烟行爨突宿火穴爐香呵鏡
雲生氣開瓶露瀉漿融融回凍頰緩緩潤枯腸興至摩

玉女集
卷之二
批唐車痛
銅斗題成汗粉墻樓臺春不遠愧我占羣芳

夜坐得四首

獨坐人無寐微吟只自聽避寒初障幔選興適傳經字
久看成綠燈徐認作青閒階聞葉響知是鶴梳翎
也識更籌永心安夢不生寒漁溪獨宿散馬野長鳴未
欠脩行力那知衰朽情塵寰有可住不必返蓬瀛
綺習消無用春光逐漸添和容看麴蘖叩齒息楞嚴遠
磬初浮戶微霜不到簾舉杯多自勸遣此夜厭厭
一住俄三載三冬又一宵琴隨榮啓樂詩共謫仙超句

好眉間漏聲諧指上調知音原好在不屑嘆無聊

勉諸子四首

來往飄然不可親時聞吟嘯落飛塵文章更續三千卷
風浴長借五六月人但覺流觴如癸丑豈惟守鼎有庚申
諸君好了青燈債莫遣槐安惑此因

任誰投筆詔飛騰屋漏當知履薄冰孟博始無慚李杜
季倫何敢望顏曾寸心自有通靈佛千古從無得道僧
本分且完香火課莫談黃老算多能

已與紅塵舉手辭那堪杯酒話心期逢人競說盧行者

瑛如集 卷二
誇我何論杜牧之誰毀誰譽維直道無驕無諂有餘師
叅禪縱是叅經確誠意修身莫自欺

一杯並不傲王侯但借行吟遣白頭快睹山河增壯麗
欣逢詩酒說風流耕田鑿井叨閒福種竹栽花當勝遊
師弟談心應記得浮雲富貴莫干求

六言

壯心自足千古老氣直橫九秋能詩不必佞佛得酒正
可封侯阮咸自愛犢鼻蘇季空嘆貂裘醉裏趙趙元箸
夢中擾擾神州

破曉自雲門至若蕢山回

晨鷄初報喔咿鳴路斷溪連百折行明月長庚光漸淡
陽春白雪句先成船孤已見竿檣影山靜不聞刀斧聲
輸與酒家勤儉慣蚤烹宿釀候先生

書草堂有意

朝朝策蹇負奚囊索取盃盤過草堂勝費醫錢九千萬
償還玉版十三行心清不作遊仙夢紙貴爭傳却俗方
他日續成長慶集一緘分寄午橋莊

書戒

失馬何曾得馬真，騎驢原是覓驢人。
不憂兩大間齊楚，祇恐一心生越秦。
曉霧合時山黯黯，微風吹處水鱗鱗。
趨炎附勢知多少，金谷回頭已化塵。

續落花詩四首

乍聞鶯語喚春酣，莫逞狂蹤恣意探。
歧路相逢原易別，癡情欲割尙難甘。
年年歲歲空相似，雨雨風風太不堪。
料得棠梨飛雪處，有人愁絕望江南。

微風送別解盤桓，萬轉千回不忍看。
生恐再來催我老，情知此去傍人難。
烏啼夢醒香猶在，子滿陰成興已闌。

流水不關塵世恨，也迎一片上漁竿。

抱膝空亭悵寂寥，躊躇蝶夢憶前宵。
雨中淚共何人灑，天外魂憑自己招。
脂粉儘憐和玉瘞，畫圖誰肯惜金描。
餘香珍重添鈴護，滿樹鶯飛頃刻消。

無言脉脉怨春光，未免多情與斷腸。
浪說王孫能作賦，悔教侍女共分香。
何時此恨都拋盡，來歲相思更寄將。
輪却紅襟雙燕子，銜泥猶得傍雕梁。

又和雲村書懷呈笠舫之作元韻

兒輩無妨樂衰年，不合悲但能娛老眼。
那復鬪時眉愛

客孔文舉彈琴鍾子期一堂朋好在情話且銜卮

又續落花詩兩首爲前四作一轉關

杜鵑啼綠上閒亭紅雨無聲煞費聽爲愁客來先擁帚
曾嫌風鬧不懸鈴從今綺麗緣俱絕自古繁華夢易醒
縱使枝頭零落盡勝他蕉額在金瓶

一片飛飛委地殘惜春無計凭闌干翻因落處無人管
數到開時若箇歡歌舞豪家圍錦障嬉游公子歇雕鞦
惟餘此恨天公道綠堦朱門一樣看

老年

老年萬事付東風只有隨緣酒興濃得句自吟還爵躡
看花無賴漸龍鍾髻絲禪榻忘機久帽影鞭塵過目慵
一樹野梅添色相飛香常滿最高峰

縹渺風吹紫綺冠團欒月挂水晶盤換心海外山何在
容膝人間地盡寬桃李成陰皆舊植桑榆畱景足餘歡
龜兒臘子尋常債已覺前生眷屬完

記得前生垂老身竹松同締歲寒因腳冰厚絮千重鞵
髮縞橫簪一措巾盎盎城衢游不夜熙熙臺榭樂長春
卽今散漫空山上分與猿麀木石親

拄杖稽城興不違
曠曠寒日有光輝
應天塔負千鈴語
射的山高一箭飛
修竹僅存王令宅
蒼苔欲沒葛翁磯
醉香樓上棲遲久
直費尊空未肯歸

西湖有感

長慶二年冬十月
曾叨簿領到餘杭
只今太守沙堤路
僧種桃花并種桑

與耽雲

耽雲五十又加四
十六年來同我遊
但有小兒名阿武
君今便勝李蘇州

梅花

橫斜疎影兩三枝
絕世丰神合讓誰
高士美人猶不稱
王孫公子欲何爲
含香正要冰霜見
索笑惟應爾我知
一樣孤芳當自賞
憑人冒雪苦吟詩

其二

竹籬茅舍豈終窮
一點芳心天地通
自是君身有仙骨
不知人世幾春風
色香味大異羣物
清瘦寒寧非老翁
下視小桃嫣杏輩
紛紛淪落在塵中

其三

畢竟難爲爾寫真簷前不厭百回巡高山之上得琴客
太古以前稱逸民若說調羹還有子可憐點額竟何人
就令兀冪無知已終與東皇作外臣

其四

丰姿綽約世間無骨到堅時貌亦臞東閣吟成憶何遜
孤山盡處見林逋相逢不負好風月着意便非真畫圖
開落有人收拾得肯教一點上蜂鬚

戲封梅花曰花媒作一絕

花邊二十四番春第一花魁報宿因惟有海棠難聘到

秋海 須卿回首作冰人

題齋壁

陶潛寫帖非求米劉向燒金只鑄經最愛長庚明月夜
頻來太乙老人星花陰步步時侵畫香篆絲絲曲過櫺
工課一無堪曠廢每愁辜此髻毛青

耽雲以放翁稿中老病無復宦情或者疑焉作此
示之題乞和爲代寫一章

也識金章可照身更思高閣畫麒麟恰逢鑿井畊田
代得作眠雲放鶴人千里壯懷甘說老十年餘俸忌論

貧劍南才客風流甚我要分他鏡水春

予亦無宦情者故云

自知齒髮浩蒼浪便合抽簪卸印牀疇昔能言闕楊墨
至今高臥到羲黃種香國外無靈藥避俗臺前有聖方
休戀一官如杜佑駝腰偃僂廁朝堂

偶寫

無是無非一酒仙尊前供養有雲烟畫圖萬壑千巖勝
詩句三山二水蕭過客停舟聞弄笛偷兒鑿壁願留氈
鏡湖總少維摩老也汲松風枕水眠

十二月初二夜月

慘淡西山挂一鉤黃昏早已別高樓江天貼下星斗色
雲樹攪成烟霧愁誰謂爰絲宜日飲頗合庾亮失風流
天公也怕雞聲誤故遣遲遲報曉籌

見雲村苦集宋句警之

一堂師弟共綢繆千載賓朋足倡酬但使拋磚常引玉
何勞集腋強成裘耳聰夢裏聞牀螿心靜毫端覷棘猴
故習依然當迅掃長歌隨我下滄洲

瓶上忽見梅花命酒喜甚

誰說乾坤酒國貧糟邱臺上八千春飛身不仗木上座
開眼忽逢梅道人空闊胸襟橫四海支離形影配雙真
官橋野店無多路直儼招邀身外身
一枝突兀冠羣芳拍案歡呼累百觴公若壺然心未醉
子猶瓶矣骨俱香丹青欲畫終嫌俗紅紫成羣未破荒
自古咏梅無好句不如付與醉千場

就詠梅花

此日纔知賞此花當時桃李競紛誇非矜傲骨凌霜信
但抱香心閱歲華何止三分贏白雪兼能一色洗丹霞

羅浮太覺殊塵世合降孤山處士家

圍居襍咏十首

道人出處久忘機恬淡生涯理不違春韭秋菘存至味
靈椿朝菌本同歸甕中一任醯鷄舞窗外頻看野馬飛
迅速光陰一彈指西山三尺沐餘暉

東西歧路擇何之但履康莊莫履危南郭子綦初喪我
東方曼倩欲飢誰欠伸未免侏儒笑陶寫常容兒輩知
能作維摩如是坐左肱據膝右持頤

天上春秋有燕鴻人間流水自西東羣兒不愛無花樹

世路常多射馬風盡遣愁端還造化好收樂事問壺公
濁賢清聖吾何別一例忘憂在此中

靈運當年已出家遠公何事太披沙時乖有淚空悲服
酒在隨歡且畫蛇罵坐灌夫今已去還鄉翁子昔曾誇
腹搖鼻息吾方睡不管朱門曉鼓撾

驅車馳馬本無心鳥脫樊籠不可尋路上空傳居士屨
座中太息雍門琴青山雲氣歸雙袖滄海功名失一鍼
晚歲所期聞大道東窗讀易見升沉

幽棲輾轉在塵埃歷覽名區越郡開氣繞五雲成吉國

法觀十輝上高臺琴聲窅窅冥鴻去花影蕭蕭倦蝶來
猶有小舟攜白石輦歸老圃墨蒼苔

叔夜休云七不堪此中祇在一無慚任他北道生張八
作我西州熟魏三竹杖芒屨同落莫金尊翠杓漫清酣
散花不染天魔女擬卽誅茅去臥龕

拔書正要目窺園負曝還看背倚軒浩蕩魚龍安海市
熙恬雞犬住桃源帽簷低小疑龜屋壺腹彭亨勝鬢
一醉不知人事改春風徐動百花幡

臘尾酣酣妙入春現身仍是苦吟身重當後輩風騷將

不媿前生隱逸人眼看屏間金孔雀手摩天上石麒麟
麤疎嫵媚都無着評品梅花總失真

數點寒梅已着花焚香長與領風華一篇書在名千古
十首詩成格幾家魚目溷珠真銜耀豨膏滑軸太簷沙
從前春夢重重了兩腋清風啜茗芽

耽雲請賞牡丹爲題一律

百年富貴幾榮落笑問此花知未知回首却憐衰白叟
賞心來赴牡丹期低吟淺酌曾相對浩態狂香亦不移
彷彿勝遊崇敬日分明重返洛陽時

蚤

四壁影徐白一燈光漸昏日輪生蕩蕩人海動喧喧卒
歲寒猶少侵晨火尙溫此時名利客已覺用心繁

過五雲寺

五雲不知處一寺忽相逢流水出方丈上堂來衆峰微
霜明遠樹修竹掩清鐘老衲畱茶飯欣然訊客蹤

題僧院梅

數點色不媚一枝香自然邈于塵世上開此老僧前靜
賞衆緣絕笑拈芳信傳橫斜踈影好常傍白雲眠

聽我談天保

桂林二千里乃有此桃源地樸民皆壽庭閒官不尊升
堂見琴鶴躋酒雜雞豚欲問甘棠渡漁舟出遠村

曉酌梅花下

曉酌一樽酒盎然春已生花兼晴雪放日共暖煙行翠
鳥鳴相對蒼苔坐欲平和風飛入手駘蕩度簾旌

書魁星石

石丈形何怪文星骨自迥飛身立東壁吐氣薄南樓妙
筆如在手羣頑皆點頭掄魁評甲乙突兀冠英流

欲出不果

不識西山路溪橋步復回生猶幾兩屐折取一枝梅雁
影連雲度漁歌遶岸來柴門仍未遠望見竹邊臺

溪橋

流水斷橋路朝南暮北風莫言村落小不與市塵通屋
險有欹石波清無釣筒兩畦新種麥多少活衰翁

耽酒

耽酒得常活彈琴終細娛人元如竹鶴官不值尊鱸橘
熟密裝籠釐香新潔厨圻泥藏瓮破灌頂辣醍醐

客送木瓜

膩手甜香飽眼黃
老年風痺得奇方
惟慚少却瓊琚報
自創新詩出錦囊

王莽

何曾支派出軒皇
豈有周公吐握忙
所恨揚雄問奇字
眼前猶不識綱常

董卓

放膽故應無健者
然臍畢竟算誰能
此中空洞原無物
只有煌煌一鬼燈

曹操

天下英雄一匹夫
儼然拒蜀要吞吳
人間兒女干卿事
費盡雄心自割鬚

秦檜

百計和戎要國傾
至今長跪不開聲
眼前一口西湖水
笑煞頑軀喫不成

讀書

資稟先天學後天
異人靈福鑄天然
崔儵讀破五千卷
王奂持齋十一年
夢境華胥曾閱歷
仙山縹渺自回旋

籌添十屋今盈否一笑空虛信口禪

亭午

亭午氣芬馥山茶紅欲然閒魚吹錦浪小鳥避爐煙暗
地霜餘濕虛牕日慢延掃牀時坦被睡價不論錢

一絕

珠幃繡帳不知寒鸚鵡淒涼訴畫欄一妾玉人春夢醒
舊時羅扇出冰紈

籬邊月季花猶盛戲題

辜負籬邊月季芳試擎銀燭照紅粧少陵偶爾忘詩料

阿母何曾喚海棠

衰羸

事去無憑印雪鴻衰羸漸學木瓜癢前園後圃烟霞外
古思今情夢寐中駐色不須開李會傳神時復犯楊風
汲泉爲洗雙荷葉且祝花前本分尊

味香失足傷手戲贈

非關代斲運斤疏萬事由來掣肘如我正尋君思把臂
天偏諷爾罷繙書從教畢卓難持蟹直訝希尼自墜驢
安得鑿家真手段爲扶藥酒入華胥

徒傳肘後有金丹拍案狂歌興已闌游戲莫施三昧巧
吟哦真苦八叉難指揮俗務粗能了翻覆人情好自看
怪道范宣神嘿嘿此身未免痛傷殘

梅花一絕

老石叢篁自結盟安排春色報先聲若教開向玉堂上
便是當年宋廣平

覺世

開口驚人全是假低頭拜佛豈非虛兩重赤壁阿房火
燒盡淫祠與惡書

釀雪

斗室樂融融擎杯問化工薄陰初釀雨微暖復噓風褥
展蛟茸紫爐秤獸炭紅倘占三白瑞拍手說年豐

雪慳

天意猶慳雪寒雲覆一江祇慚潘岳鬢未和郢人腔失
喜吟冰柱關情望紙窻呼兒溫宿酒淺酌對銀釭

北邙

狂蜂釀蜜競排衙歸燕銜泥各到家莫道北邙惟白骨
銷魂猶有古樗花

北邙無林木惟古樗可十畝

